

Mondièi Junior: da Davos a Fascia

Na delegazion fascèna é jita te la zitadina de la Svizra romancia en ocasion de l'event sportif che n auter an sarà te noscia val. I studenc del Liceo Soraperra à zipià na statua de neif



La statua de neif realisèda dai studenc del Liceo Soraperra de la Scola de Fascia a Davos.

Dai 30 de jené ai 8 de firé a Davos, te la Svizra romancia, l'è stat metù a jir i Campionac Mondiei Junior de schi alpin 2018. Se trata de l'event sportif piú emportant a nivel mondiel resservà ai joegn fin ai 21 egn, e l'an che vegn, piú avisa dai 18 ai 27 de firé del 2019, l'vegnerà endrezà te Fascia.

Per chesta rejon te chi dis ence n grop de fascegn é jit ti Grijons.

I prumes a jir te la zitadina romancia l'è stat n grop de studenc del Liceo de la èrts G. Soraperra de la Scola Ladina de Fascia. Chisc studenc: Mariasole Cavalieri, Maria Giacomelli, Luca Debiasio e Michele Cauria, coordené dal professor Davide Deflorian à realisà a Davos na statua de neif che fegura l mus de n schiador e l simbol ofizial di mondièi 2019 te Fascia.

Ti dis dò l'è ruà via ence n grop de componenc del Comitad de endrez di Mondiei Junior 2019, per tor pèrt a la manifestazion, vardèr e tor sù indicazions ütles per l'endrez, meter a fech amò vèlch detai con la

Federazion Internazionèla de Schi e no da ultim per tor sù l testamonech per i Mondiei de l'an che vegn.

L'era Alessia Debertol, che se cruzia del setor de la garejèdes e de la costions generèles, i responsàboi per servijes e segurezza Cristoforo e Rinaldo Debertol, i esperc per i portoes e i aspec tecnicos de la gares Cesare Pastore e Marco Costazza e amò, per la prejentazion ofiziala, l'è ruà a Davos ence l vizepresident Renzo Minella, l project manager Filippo Bazzanella, l raprezentant de la Monti Pallidi Carlo Ganz, l'assessor al sport del CGF Matteo Iori e l responsabol de la comunicazion Mauro Bonvecchio.

Tel cors de la zerimonia che à serà sù i mondièi l passaje de testamonech é stat fat diretamente anter i joegn atlec de la nazione Svizra e chi de la nazione taliana. L'apuntament é donca te n an te Fascia, sui portoes de Aloch e Sèn Pelegrin, per i Mondiei Junior 2019.

